

MISHKUTUIAPEU

Ishpashtien Nuna

Uishtaua uitshimeu itakanu, mak nenua umisha, eukuannu, uishtaua nenua uitshimeu. Ek^u etat mani, apu tshi pimutet an. Ekute muk^u nanitam etat anite uitshuat, anitehe etaniti nenua umisha, ek^u nikuteu kanapua mani. Ek^u nenua uishtaua eukuannua muk^u netutikueniti mani nanitam tshashikaniti.

« Ek^u pimishinu », iteu itakanu nenua ushima, « nete akamishkutet (akamit nete uitshinitsheni pet tipakam). Eukua uetinak apuanashkunu : 'Ma nishtau uiapamaut atikua, ma niatat, niatshitatshimushtuat (ne ka-pamitatshimunana ne atik^u niatakaniti), ma niatat, ma pieshuapamat tshitshue.' Ek^u uetinak apuanashkunu (e tshishtaikanit uiash) : 'Ma tshe passuat', ka-passitsheua ekue itit », iteu itakanu nenua ushima (ne ishkuieu tipatshimeu nenua). Nanitam mani eukuan eitit.

— Tshishtau, ma tshinipaiiau atik^u ? tekushinniti.

— Mauat.

— Ek^u ka-tshinipaiiua atik^u, tshuapamitin, iteu.

— Ninipaiiau utin, itiku.

Shash nenu mashkatenimeu nenua uishtaua.

Minuat, aishkat utin, katak^u tanite tauat anite nutshimit. Minuat pepamuteniti uishtaua. Minuat uiapamat uishtaua (matau-katshiu an, itakanu, ne auass).

— Ma, iteu, niatat atikua nishtau, ma pieshuapamat, ma tshe passuat.

Ma uetinak apuanashkunu minuat, ek^u ka-passetsheua ekue itit. — Ma mishkuaueu, mishkuaueu, iteu. Ma uanatikuat nishtau.

Ek^u katshi uinatikuat, tshauet ne uin. Ek^u tekushinniti nenua mani uishtaua :

— Tshishtau, ma tshinipaiiau atik^u ?

— Mauat, etikut mani.

— Ek^u ka-tshinipaiauti atikuat, iteu.

— Ninipaiauat utin, itiku.

Shash mashkatenimeu nenua uishtaua (tanite uapamiku nenu kassinu eitit nete tshashikaniti).

Ek^u katak^u anite nutshimit tauat tanite. Kassinu tshekuannu apu kanuenitahk : tshishtemaua, nipisha, kashiuashinit, kassinu tshekuannu apu kanuenitahk.

— Tshishtau, ma tshui pituan ek^u ? iteu.

— Eshe, tshitshue nui pituan, itiku (tanite muatikueuat).

— Pasha ma, iteu, (ushpishkunnu, ushpikaia pashaminua).

Nika natashtikushueuan nishtau.

Ek^u tapue piashaminiti umisha.

— Tan tshipa itapatishin tshi natashtikushuein eshpish mishta-katak^u ute taiak^u nutshimit ? itiku nenua umisha.

Ek^u tshietshishepaushinit uetapanikashut.

— Nika natashtikushuen ek^u, tshishtau, iteu (tanite katak^u, mishta-katak^u anite nutshimit).

Tshatutet tshietshishepaushinit katshi utapanikuakanit. Eukua ! Ek^u shash nekani tshitutenua uishtaua, ek^u uin eshk^u anite tau. Tshietshishepaushinit ma uiapannit : « Tshe aitikue ma... », itenimeu. Eukua tshatutet. Anite amatshuetapeu, mushuashinu anite. Nete ma takutaut, ekute uet eka pimutet. Peikutshishikueu muk^u, pimuteu... Apu pimutet, pimipanu. Ekue matapet nete. Ekue natashtikushuet ekue aiat kassinu tshekuannu. Ek^u kassinu katshi aiat tshekuannu, ek^u shunashkuataim^u uetakussiniti (nishutipishkua nete tau uinipekut, matapeu nenu katshi tshitutet), shunashkuataim^u uetakussiniti (tanite metuenannu, ekute anite etat mani). Katshi aiat nenu, ek^u nenua utshimaua itiku :

— Tshekuan au eka nita tshekuan tshinipatanaua, nanitam tatuau tekushinini anite ut nutshimit ?

— Eshe, iteu, apu tshekuan nipataian, nishtau nenu kassinu.

Ek^u shunashkuataim^u, nishutipishkua tau anite uinipekut.

Miam at akua-tipishkanu ma, ek^u uetapanikashut. Eukuannu nashutipishkuet. Ekue tshitutet tepishkanit. Miam at tshikanakuannu ma, nete etat uitshuat, ekute uet pimutet ek^u, at eishitapet nenu. Tiepuatat umisha (tanite muk^u nishutipishkueu) :

— Nimish, iteu, nitakushin au shash !

Tshekuannu, tapue kassinu tshekuannu takuannu, iapikunaminiti utapan umisha : tshishtemaua, kashiuashinit, nipisha, kassinu tshekuannu takuannu !

Tekushinit nahi, nemenua uishtaua tatuetaminitaka anite, tipatshimunitaka anite uinipekut eitinnut. « Shash kassinu matapeuat anite innuat », itikutak

(itatshimushtuenua nenua umisha). « Tanite ek^u tshipa ut tshi uapatam^u ?

Nishutipishkua muk^u.

E ma mishta-katak^u ute nutshimit... », itenimeu. Shash umenua aieshkuneu tshishtemaua (ne tshishtemau eshinakushit peik^u). Shash papuakuneutishunitaka nenua uishtaua. Ekue pitutsheniti uishtaua, shash ut mineu.

— Ume, tshishtau, ka ui pituain, iteu.

Mineu nenua tshishtemaua ekue tipatshimut. Tshishtemaua nenua tapue, nishutipishkuenua muk^u, eukuannu meshkatenimat. Nemenu ka ut tshituteniti, eukuannu metitat uiapannit. « Tshe aitikue ma... », itenimeu. Shash tshissenimeu nenu mematau-katshiuniti uishtaua. Mititeu nenu ka ut atimuteniti, nemenu ma uet iamatshuetapenut, tshek minaush shuakunatshineshinua kunit, tshek muk^u eshpitashkushishiniti utapanashkua, tshek nete apu uapatat. Ek^u tshessenimat eitiniti nenua uishtaua.

Ek^u iteu :

— Nimishe, nitshishimik^u utshimau, iteu. « Apu nita tshekuan nipatain », nitik^u. Nika unaitshen ma.

Ek^u etutak uunaikan¹ . Nete etishkueshinit, ekute etutak uunaikan.

— Ma tuta, iteu, shipaitakana : peik^u ishkieiapishtan-shipaitakan mak peik^u napeiapishtan-shipaitakan.

Akua-tipishkanit katshi nipaniti uishtaua, ek^u anite etishkueshinit, ekute etutak, pessish anite. Apu nipat, nepaniti uishtaua. Apu minekash itishinit katshi upaik uunaikan. Shash matuetitanua ekue shatshuapatak. Auennua nenua, uapishtana !

¹ Uin nenu uunaikan.

Ekue pitukaiat at nenua ekue pakunat at nenua ekue shipauat at nenua, miam at katshishushinua apishish nenua, shash at pashunua kie shash nenu upaim^u utishunakan. Miam at pashunua nenua uapishtanima, shash matuetitanitaka minuat. Muk^u eukuan eshinakushit tepishkanit : miam at katshishuniti, miam at pashuniti mani nenua uapishtana, ashku pashueu nenua uapishtana. Nanitam, nanitam, eshakumitipishkua, eshakumitipishkua eukuan etit, tshek mishta-mitshetinua. Ek^u nataik uunaikan ekue punit eshpish mishta-mitshet maunat tepishkaniti. Katshi apita-tipishkaniti eukuan eitit, eukuannu, mashkatenimeu uishtaua.

Nete uinipekut nenua tanua ukauia, ek^u eitaht anite. Nete pimishinnua. Apu an, itakanu (auass ne).

— Ueshausham ek^u ka-nitshissitutuataka tshikauinan, iteu nenua umisha.

« Ekue titipeietshipaniut uuapuian² », iteu itakanu, « pishkutueietshipaniut uuapuian ekue kupaniut niate, eukuan etishinit. » — « Nipatshe kanapua », itenimetshe ne ushima. Tshek ekue natat.

— Tan etit, tan etit an ? iteu.

Takushinnua nenua uishtaua.

— Nipau an, iteu, nipapan an. Eukuan issishuepan.

Ek^u eshpish eka ui uniniti, tshek ekue natat ne uishtaua. Auennua nenua, shash nipinua !

Eukuan eshkuapetshishit.

² Uin nenu uuapuian.